

# Era istòria d'Espécialitats Cobo

Nòm:

Grop:

## Un negòci familiar e artesanau qu'adocís eth paladar des persones.

A diferència de d'alti empenhedors qu'an eretat era estima des pairs o es pair-sénhers per un ofici, Joan Cobo non auie arrès ena familha que se dediquèsse ara elaboracion de docí artesans. Era sua passion ère innata e cercarie era manèra de desvolopar-la.

Atau ac hec quan destinèren ath sòn pair ara estacion de trens, en Lhèida. Joan profitèc era circumstància entà començar a trabalhar ena pastisseria Terés dera ciutat. Mès tard envièren ath pair tara Espluga de Francolí, un pòble dera província de Tarragona. Joan tanben lo seguic entà èster ath costat des pairs e dera sua parelha.

Ena Espluga de Francolí hège d'ajudant ena pastisseria de Piu Carulla, un des prumèrs artesans de carquinhòlis ena poblacion, e ath madeish temps elaboraue Marilyn's e carquinhòlis peth sòn compde e les venie. Ère ua persona activa que gaudie fôrça en tot preparar aguestes delícies. Quan anèc tara mili sa mair lo relheuèc en negòci.


Es Marilyn's son galetes en forma de ventalh, d'ua suavitat e textura que les hè uniques e tipiques dera Espluga de Francolí. Josep volie nomenar-les "Maria" en aonor ara sua hemna, mès existien ues pastes damb aguest nòm. Per açò pensèc en nòm de "Marilyn's" qu'ath madeish temps hè referència ara actritz Marilyn Monroe, icòna dera epòca. Er an 1963, ja maridat, cromptèc era pastisseria de Piu Carulla e eth locau deth costat a on hègen es galetes. Joan e Maria portauen eth negòci e animauen as sòns hilhs petits a colaborar en petiti trabalhs.

Pendent toti aguesti ans Espécialitats Cobo a evolucionat e es tres hilhs e un nebot de Joan e Maria son aué en dia ath devant deth negòci. Era pastisseria se tròbe en madeish lòc, mès era fabrica ei mès grana e ei plaçada en un aute espaci dera Espluga de Francolí.

S'es carquinhòlis e es Marilyn's sigueren es productes damb es quaus comencèren , damb eth temps, an agranit es especialitats e ara aufrissen: neules, cubans, bromes d'amèlta, còcos, pets de monja, teules, etc. Ath delà, d'octobre a abriu hèn quauques especialitats damb chocolate e en iuèrn creen torròns de fantasia damb sabors diferenti coma eth de pinha colada, lima e citron, iranja e aranja, jòrdons damb vainilha...

Mès ací non acabe era innovacion en nauí productes e presentacions, tanben elabòren carquitànies que son carquinhòlis petiti que consèrven era textura e er aroma originau, les banhen en chocolate mejançant un procès de centrifugacion e a cada un li dan un acabat diferent, per exemple: de haraga, chocolate nere o iranja.

Era modernizacion des maquinas a auut un papèr fundamentau en aument dera produccion e es vendes. D'alti còps es Marilyn's se hègen en maquinas tradicionaus de tres plats de premsa que s'escauhauen damb tres hornèus e era pasta se vuedaue damb ua olièra.





Ara dispòsen de tretze plats e compden damb un dosificador que barrege era pasta. Dempús, coma tostemp an hèt, la trabalhen sus eth plat entà auer era forma desirada. D'un quilò de galetes en ua ora an passat a produir-ne 6 quilòs.

Eth cambi ei ua realitat, mès i a causes que jamès càmbien pr'amor que son era esséncia e era valor principau dera empresa. Espécialitats Cobo fabrique tostemps a man, pèça a pèça, totes es sues espécialitats, en tot trabalhar damb productes naturaus de grana qualitat. Venen es productes en Catalonha, Andòrra e quauqui aeropòrts d'Espanha.

Mercè, Carme e Joan, hilhs deth fondador, e David, er arrèrhillh, vòlen mantier era estructura petita e familiau deth negòci, e elaborar galetes e docí artesans dera forma tradicionau tà qu'es clients gaudisquen ath maxim des sòns productes e receben un tracte propèr e personau.

Se vòs mès informacion sus Espécialitats Cobo, consulta era plana web: <http://especialitascobo.cat>

## VOCABULARI E EXPRESSIONS

**Innat:** qu'a neishut damb er individu.

**Jordon:** Eth jordon, ei eth frut dera jordoèra, planta sense punches.

**Prensa:** maquina constituïda basicaments per dus elements planèrs o cilíndrics, generauments er un fixe e er aute mobil, disposadi d'ua forma que per accionament mecanic, idraulic o pneumatic pòden pressionar entre eri ua causa tà subjectar-la, estronhar-la, esprémer-la, estampar-la, etc.

## SINONIMS

**Esséncia:** centre, còr.

**Propèr:** estret

## 1 AUEM CURIOSITAT

1. As bèra passion o predileccion per ua activitat qu'ages eretat dera familha o ben que sigue innata com era de Joan Cobo? Explica-la.

.....

2. Quines son es principaus diferéncias entre un producte artesanau e un producte industriau?

.....

3. Com afècte era modernizacion des maquines ena produccion d'ua empresa?

.....

4. Cres qu'ei important qu'ua empresa auferisque un tracte propèr e personalizat as clients? Perqué? Argumenta era tua opinion.

.....